

美對遠東態度明朗化

美總統羅斯福氏，於五日發表動人演說，綜其要點，約有三端：第一，愛好和平各國，對於目無法律，蔑棄人道，在國際上造成不安與無政府狀態者，應努力加以反抗；第二，若干國家，一面要求自由，一面不自由給與其他國家，無端侵佔領土，濫施轟炸，使無辜之平民婦孺慘死，世人必須將國際道德及諾言與簽字之尊嚴，予以恢復，使企圖違反現行條約而侵犯他國權利之各國，知所警惕；第三，並世各國，信息相關，且有連帶關係，任何一國，苟欲完全孤立，無論在精神上或技術上，皆為不可能之事，現和平已感受威脅，戰爭亦已爆發，不論是否經過宣戰手續，均有蔓延可能，美國既痛惡戰爭，希望和平，則對於覓求和平一事，自當積極參加。可見羅斯福氏對於現世之危機，認識極深，關懷倍切，其所責斥之國，雖未指點其名，然意在倭寇，實無疑義，蓋倭軍侵入中國領土，逞其飛機大砲之淫威，到處焚燒，遇人屠殺，法律人道以及諾言簽字之尊嚴，不特為之潰喪已極，抑且為之毀滅無餘，中國固已受其毒害，各國亦胥遭其禍殃，美雖遠隔大洋，而其貿易經濟乃至政治上所受之惡劣影響，已不可言狀。少數之美國人士，或惕於歐戰教訓，或迷於孤立理想，對於倭寇侵華所受之間接影響，頗有未能感觸而發為旁觀之論者，今得羅斯福氏指明「決非採取孤立或中立政策所能濟事」之旨，當亦可以恍然大悟，而積極致力於破壞和平

約威力，保障人類文明，使叢爾小醜之倭寇，不敢放肆而為惡，則其裨益於東亞以至全世界者，即可大收實效。現觀羅斯福氏之言論，顯已表示光明正大之態度，愛好和平之人，固無不同聲欽頌，即冥頑不靈之倭寇，亦必聞而胆寒。且美政府繼續羅斯福氏演說之後，發表嚴正之聲明，提示國際關係中應守之原則，即一，各國不逞武力以施行政策，不干涉他國內政；二，國際問題，須以和平交涉及協商求其解決；三，各國須尊重他國之權利，並恪守其確定之義務；四，各國須篤信條約神聖之原理；而倭寇在華之行動，完全違反此等原則，且破壞九國公約對華關係之條款，及毀滅非戰公約之規定。是倭寇之罪惡，已為美政府所正式公認而痛責之，與國聯大會之決議案，若合符節，所謂公理自在人心，是非存於天下者，彌足徵信。

矧美素為中國之良友，吾人自始至終，信其不至屈於強權而改變態度，今由羅斯福氏之演詞及其政府之宣言證之，益見其態度之明朗化。以此明朗化之態度，警告野蠻性之國家，其功效不啻臨之以十萬雄兵，蒙其休者，固不獨一民族或一國家已耳。近代國家之富強要素有三，即人力物力及組織是也，而各國之中，完全具此三要素者，厥唯美國。故美國之於世界和平或戰爭，實有支配之勢力，美如用實力以倡導和平，則和平可致，若袖手以旁觀戰爭，則戰爭不已，事實昭然，非幻像也。現美政府既以堅決之態度，保障國際間之和平，吾人更望其能以有效之手段，制裁侵略國之暴行。

